

## **БАЁННИНГ КЎЧИРМА НУСХАСИ**

### **Давлат харидлари соҳасидаги шикоятларни кўриб чиқиш бўйича комиссия йиғилишининг 5-сонли баён нусхаси**

**Тошкент шаҳри**

**2023 йил “5” апрел**

**Раислик қилди:**

Иқтисодиёт ва молия вазири ўринбосари –  
комиссия раиси - Г. Рахимова

**Қатнашдилар:**

Давлат харидлари соҳасидаги  
шикоятларни кўриб чиқиш бўйича комиссия  
аъзолари

**Таклиф этилганлар:**

“One team medical” компанияси вакиллари,  
“Nurafshon maxsus texnika” МЧЖ вакили,  
“Ўзбекистон” нашриёт матбаа ижодий уйи МЧЖ  
вакиллари, Андижон вилоят соғлиқни сақлаш  
бошқармаси мутахассислари, “Шўртан газ кимё  
мажмуаси” МЧЖ мутахассислари, Фарғона  
вилояти ИИБ Жамоат хавфсизлиги хизмати Йўл  
харакати хавфсизлиги бошқармасининг махсус  
эксплуатация-монтаж бўлими мутахассиси,  
Таъминот ва логистика хизмати ДУК вакиллари.

Давлат харидлари соҳасидаги шикоятларни кўриб чиқиш бўйича комиссия  
йиғилишининг кворуми – 86 %.

#### **КУН ТАРТИБИ:**

**1.** Давлат харидлари соҳасидаги шикоятларни кўриб чиқиш бўйича  
комиссияга келиб тушган “Polisteel solutions Pte. LTD” компаниясининг 2023-йил 27-  
мартдаги PS246-сон ва 2023 йил 30 мартдаги PS278-сонли мурожаатлари.

**2.** Давлат харидлари соҳасидаги шикоятларни кўриб чиқиш бўйича  
комиссияга келиб тушган “One team medical” компаниясининг 2023-йил 30-мартдаги  
30/03-сонли мурожаати.

**3.** Давлат харидлари соҳасидаги шикоятларни кўриб чиқиш бўйича  
комиссияга келиб тушган “Nurafshon maxsus texnika” МЧЖнинг 2023 йил 24  
мартдаги 01/147-сонли мурожаати.

4. Давлат харидлари соҳасидаги шикоятларни кўриб чиқиш бўйича комиссияга келиб тушган “Ўзбекистон” нашриёт матбаа ижодий уйи МЧЖнинг 2023 йил 4 апрелдаги 01/09-272-сонли мурожаатлари тўғрисида

---

**Кун тартибидаги 1-масала юзасидан.**

Комиссия аъзолари сўзга чиқиб, мурожаат муаллифи “**Polisteel solutions Pte. LTD**” компаниясининг мурожаатида кўтарилган масалалар билан иштирокчиларни таништирди.

Унга кўра:

“Шўртан газ кимё мажмуаси” МЧЖ томонидан 2023 йил 17 февралдаги 231426-сонли лот рақами билан ўтказилган энг яхши таклифларни танлаш савдолари жараёнларида:

харид комиссияси ҳаракатларида рақобат ва ҳолислик тамойилларига риоя этилмаганлиги;

харид комиссияси томонидан тендер талабларига тўлиқ жавоб берадиган таклиф тақдим этилганига қарамай асоссиз паст баҳолангани;

мурожаат муаллифи иштирокчини асоссиз сабаблар билан харид жараёнларидан дисквалификация қилинганлигини баён қилган ва Комиссиядан мазкур масалани ижобий ва ҳолисона ҳал этилишида амалий ёрдам сўралган.

Шундан сўнг “Шўртан газ кимё мажмуаси” МЧЖнинг вакиллари сўзга чиқиб бир қанча масалаларга ойдинлик киритишди. Хусусун:

Шўртан газ кимё мажмуаси полиэтилен цехининг “реакция ва қайта ишлаш блоки” учун силикагел кимёвий реагенти етказиб бериш бўйича мурожаатчининг таклифи эксперт комиссиясига тақдим қилинганлиги ва унга кўра мурожаатчи томонидан таклиф этилаётган маҳсулот ишлаб чиқарувчиси “Qinghuangdao chemical Co.LTD (Хитой)” компанияси эканлиги;

мурожаатчи томонидан таклиф этилган маҳсулот бу компания томонидан “sclairtech” технологияси асосида ишлаб чиқарилгани;

ушбу тизим циклогексан ва бутан-1 кетонлар ва намликни олиб ташлаш учун силикагел адсорбентидан фойдаланиши;

мурожаатчи таклиф қилаётган силикагел 3-5 мм гранулага эга эканлиги, бу техник топшириқда белгиланган 6x10 (3.36 мм-1.41 мм) талабга мос келмаслиги;

мурожаатчи томонидан таклиф этилган маҳсулот адсорбент гранулаларининг ўлчами бевосита сирт майдонининг ўлчамига боғлиқ бўлиб, бу ҳолат адсорбент вақтини қисқартиришга олиб келиши;

вақт қисқариши ҳисобига адсорбентнинг регенерациялар сони ортиши ва адсорбентнинг адсорбсион қобилятини йўқотишга олиб келиши;

тақдим этилган маҳсулот гранулалар ўлчами ва сифати бўйича силикагел атсорбент учун техник шартлар талабларига жавоб бермаслиги ва шунга асосан

мурожаатчининг таклифи эксперт комиссияси томонидан кейинги босқичга қўйиш тавсия этилмаганлиги маълум қилинди.

Йиғилиш давомида таклиф этилган вакиллар томонидан билдирилган фикр ва ахборотлар Комиссия аъзолари томонидан тўлиқ тингланди.

### **Кун тартибидаги 2-масала юзасидан.**

Мурожаат муаллифи **“One team medical” МЧЖ** вакили сўзга чиқиб мазкур мурожаатда кўтарилган масалалар билан йиғилиш иштирокчиларини таништирди.

Хусусан унга кўра, Андижон вилоят Соғлиқни сақлаш бошқармаси томонидан 2023 йил 3 мартдаги 233066-сонли лот рақами билан “Лапороскоп тиббиёт ускунаси сотиб олиш” юзасидан ўтказилган энг яхши таклифларни танлаш савдолари жараёнларида:

харид комиссияси томонидан баҳолаш жараёнларида аниқ мезонлардан фойдаланилмаганлиги;

мазкур танлаш савдоси жараёнидаги шартларда рақобатни чекловчи ҳолатлар мавжудлиги ва харид комиссияси ҳаракатлари “Давлат харидлари тўғрисида”ги қонун талабларига жавоб бермаслиги;

танлов ҳужжатларида молиявий ҳисоботларнинг омборхонада мавжуд маҳсулотлар қисмини тўлдириш талаби қўйилмаганлигини лекин буюртмачи томонидан “One team medical” МЧЖдан ушбу талаб бажарилмаган деб топилганини ва асосиз паст балл қўйилганлиги;

юқоридаги каби талаб қўйиш рақобатни чеклаш эканлигини ва бу “Давлат харидлари тўғрисида”ги қонун талабларига зид эканлиги;

мурожаат муаллифи томонидан танлаш ҳужжатларида талаб этилган солиқдан қарздорлик ҳақидаги маълумотлар юборилганлиги, бироқ буюртмачи томонидан ушбу маълумотни тақдим қилинмаган деб топилгани;

харид комиссиясининг ҳаракатларида давлат харидларининг рақобат ва ҳолислик принципларига риоя этилмаганлиги, ушбу давлат харидида рақобатни чекловчи шартлар қўйилганлиги ва бошқа важлар йиғилиш иштирокчиларига таништирилди.

*Маълумот учун. Иқтисодиёт ва молия вазирлиги томонидан 03.04.2023 йилда Андижон вилоят Соғлиқни сақлаш бошқармасига мурожаатда келтирилган масалаларга асосли тушунтириш ва маълумотлар тақдим қилиши бўйича мурожаат йўлланган ва жавоб хати олинган.*

Йиғилиш давомида Андижон вилоят Соғлиқни сақлаш бошқармаси вакиллари сўзга чиқиб мурожаат юзасидан бир қанча саволларга жавоб беришди.

Хусусан, ушбу тендер савдоларида 7 нафар иштирокчи ўз таклифларини билдирган бўлиб яқунда энг юқори балл тўплаган “Edan-med-servis” МЧЖ тендер савдолари ғолиби деб топилганлиги;

ахборот порталига қўйилаётган талабларда энг паст баҳолаш 0 балл, энг юқори баҳолаш 10 балл қилиб белгиланганлиги;

“One team medical” МЧЖ томонидан 1-топшириқ бўйича сўралган ҳужжатлар ичида солиқлар ва бошқа йиғимлардан муддати ўтган қарздорликлар йўқлиги тўғрисида маълумот тақдим этмаганлиги сабабли балл пасайтирилганлиги;

1-топшириқнинг 4-шаклидаги иштирокчининг молиявий ҳолати сўралган жадвалда тайёр маҳсулотлар қаторида маҳсулот борлиги акс эттирилмаганлиги сабабли балл пасайтирилганлиги маълум қилинди.

Ўзбекистон Республикасининг “Давлат харидлари тўғрисида”ги Қонунинг 61-моддасига мувофиқ, танлаш ўтказишда иштирокчиларнинг барча таклифлари танлаш бўйича харид қилиш ҳужжатларида кўрсатилган мезонлар асосида баҳоланади ва танлаш ўтказиш баённомасида қайд этилиши белгиланган.

Шу билан бирга, комиссия тақдим этилган ҳужжатларни ўрганиб чиқганда, “One team medical” компаниясининг мурожаатида келтирилган эътирозлари асосли эканлиги, техник ҳужжатлардаги қўйилган талаблар бажарилган бўлсада буюртмачи томонидан рақобат ва баҳолаш мезонларига амал қилинмаганлиги (баллар асоссиз паст қўйилганлиги) ва натижада мурожаатчининг манфаатлари бузилганлиги маълум бўлди.

Йиғилиш давомида таклиф этилган вакиллар томонидан билдирилган фикр ва ахборотлар Комиссия аъзолари томонидан тўлиқ тингланди.

### **Кўн тартибидаги 3-масала юзасидан.**

Мурожаат муаллифи “Nurafshon maxsus texnika” МЧЖ вакили сўзга чиқиб, ўз мурожаатида кўтарилган масалалар билан йиғилиш иштирокчиларини таништирди.

Хусусан, “Nurafshon maxsus texnika” МЧЖ (СТИР 306167934)нинг Ўзбекистон Республикаси ИИБ Фарғона вилояти ИИБ Жамоат ҳавфсизлиги хизмати Йўл ҳаракати ҳавфсизлиги бошқармасининг махсус эксплуатация-монтаж бўлими томонидан 232793-сонли ва 236445-сонли лот рақами билан ўтказилган энг яхши таклифни танлаш (кейинги ўринларда - танлаш) савдолари жараёнида:

харид комиссияси томонидан баҳолаш мезонлари бузилганлиги, давлат харидларида рақобат ва ҳолислик тамойилларига амал қилинмаганлиги;

Тошкент вилоят Статистика бошқармаси маълумотида кўра, “Nurafshon Maxsus Texnika” МЧЖ (IFUT-29100) “Моторли транспорт воситалари ишлаб чиқариш” тури билан шуғулланувчи тадбиркорлик субъекти сифатида статистик ҳисобга олинганлиги;

Савдо-саноат палатаси Тошкент вилоят ҳудудий бошқармаси маълумотларига кўра, Жамият томонидан самосваллар, карьер самосваллари, электротехника лабораторияси, комбинацияланган йўл машиналари, суғориш- ювиш машиналари, ярим тиркамалар, автоцистерналар, автомобилларга ёқилғи қуйиш машинаси, чиқинди ташиш машиналари, оғир юк машиналари, тиркамалари ва бошқа товарларни ишлаб чиқариш билан шуғулланганлиги;

“Nurafshon maxsus texnika” МЧЖнинг юқоридаги лот рақамлари билан

ўтказилган давлат харидларида белгиланган тартибда ўз таклифларини киритганлиги, бироқ юқорида кўрсатилган иккала танлаш натижалари бўйича “Nurafshon maxsus texnika” МЧЖ захирадаги ғолиб деб топилганлиги;

2023 йил 2 мартдаги 232793-сонли лот рақами билан ўтказилган танлашда мурожаатчи ғолиб деб топилган корхонадан ҳар бир етказиб берилиши лозим бўлган товар учун 45 650 000 сўм паст нарх таклиф этганлиги (танлашда 50 дон микдордаги товар етказиб берилиши инобатга олинса, жами  $(50 * 45\,650\,000) = 2\,282\,500\,000$  сўм микдордаги бюджет маблағлари тежаб қолиниши);

2023 йил 16 мартдаги 236445-сонли лот рақами билан ўтказилган танлашда мурожаатчи ғолиб деб топилган корхонадан ҳар бир етказиб берилиши лозим бўлган товар учун 45 100 000 сум паст нарх таклиф этганлиги (танловда 50 дон микдордаги товар етказиб берилиши инобатга олинса, жами  $(50 * 45\,100\,000) = 2\,255\,000\,000$  сум микдордаги бюджет маблағлари тежаб қолиниши);

ҳар бир ўтказилаётган танлаш жараёнларида танлов ташкилотчиси томонидан танлаш ҳужжатлари тўплами бириктирилиши белгиланганлиги, бунда танлаш иштирокчиси танлаш ташкилотчиси бириктирган ҳужжатлар асосида ўзининг таклифларини тўлиқ киритиши лозимлиги, бироқ юқорида кўрсатилган лотлар бўйича ўтказилган танлашда - буюртмачи Фарғона вилоят ИИБ Жамоат хавфсизлиги хизмати Йўл ҳаракати хавфсизлиги бошқармасининг махсус-эксплуатация монтаж бўлими томонидан харид ҳужжатлари бириктирилмаганлиги ва бошқа важлар маълум қилинган.

*Маълумот учун. Иқтисодиёт ва молия вазирлиги томонидан 30.03.2023 йилда буюртмачига мурожаатда келтирилган масалаларга асосли тушунтириши ва маълумотлар тақдим қилиши бўйича мурожаат йўлланган ва жавоб хати олинган.*

Юқоридаги масалалар юзасидан буюртмачи вакили сўзга чиқиб мурожаатдаги масалаларга ойдинлик киритди ва булар жавоб хатида ҳам маълум қилинганлигини айтиб ўтди.

Унга кўра:

Фарғона вилоят ИИБ Жамоат хавфсизлиги хизмати йўл ҳаракати хавфсизлиги бошқармасининг махсус-эксплуатация монтаж бўлими томонидан 232793-сонли лот рақами билан ўтказилган танлашда ишчи ходимлар сони нисбатан камлиги сабабли иштирокчига 4 балл берилганлиги, маълумот сайтдан олинмаган, банкрот эмаслиги тўғрисида кафолат хатида тегишли давлат муссасиси (Иқтисодий суд, давлат активларини бошқариш агентлиги) хатини буюртмачига тақдим этиш зарурлиги, шу сабабли иштирокчига 4 балл берилганлиги;

236445-сонли лот рақами билан ўтказилган давлат хариди жараёнида, банкрот эмаслиги тўғрисида кафолат хатида тегишли давлат муссаси (Иқтисодий суд, давлат активларини бошқариш агентлиги) хатини буюртмачига тақдим этиш зарурлиги сабабли иштирокчига 4 балл берилганлиги;

баҳолаш мезонлари фақат техник, статистик, молиявий кўрсаткичларга асосланиб баҳоланганлиги маълум қилинган.

Йиғилиш давомида таклиф этилган вакиллар томонидан билдирилган фикр ва ахборотлар Комиссия аъзолари томонидан тўлиқ тингланди.

Ўзбекистон Республикасининг “Давлат харидлари тўғрисида”ги Қонуни 32-моддасига мувофиқ, иштирокчиларнинг таклифларини баҳолаш ва ғолибни аниқлашда давлат буюртмачиси фақат харид қилиш ҳужжатларида кўрсатилган баҳолаш мезонлари ва тартиб-таомилларидан фойдаланади ҳамда бу мезонлар ва тартиб-таомилларни ушбу ҳужжатларда баён этилган тартибда қўлланиши назарда тутилган.

Шу билан бирга, комиссия иш ҳолатларини батафсил ўрганиб чиққанда, “Nurafshon maxsus texnika” МЧЖнинг мурожаатида қайд этилган этирозлар асосли эканлиги, хусусан буюртмачи томонидан баҳолаш мезонлари бузилганлиги, рақобатни чеклашга олиб келадиган ёки олиб келиши мумкин бўлган ҳаракатлар мавжудлиги аниқланди.

#### **Кун тартибдаги 4-масала юзасидан.**

“Ўзбекистон” нашриёт матбаа ижодий уйи МЧЖ вакиллари сўзга чиқиб мурожаатда қайд этилган масалалар билан йиғилиш иштирокчиларини таништиришди.

Хусусан, Таъминот ва логистика хизмати ДУК 2023-2024 ўқув йилига умумий ўрта таълим ташкилотлари учун нашр этилиши режалаштирилган КЭМБРИДЖ университети нашриётининг 1-11 синф инглиз тили фанидан машқ дафтарлари, дарсликлар ва ўқув методик мажмуалар сотиб олиш учун ўтказилган жами 11 та лотлар (№235685, №235688, №235689, №235690, №235691, №235692, №235693, №235694, №235695, №235696, №235697) юзасидан:

“Ўзбекистон” нашриёт-матбаа ижодий уйи МЧЖ томонидан қўйилган мезонлар бўйича тўлиқ маълумотлар берилган бўлсада, харид комиссияси биринчи мезон “баланс ҳисоботида кредиторлик қарздорлиги кўрсатилган бироқ тасдиқланган тендер ҳужжати талабларига асосан 4-сон шаклда кредитор қарздорлиги кўрсатилмаган” дейилгани, ваҳоланки “Ўзбекистон” нашриёт-матбаа ижодий уйи МЧЖ 4-сон шакл (тендер иштирокчисининг молиявий ҳолатини) тўлиқ тақдим этганига қарамай асоссиз важ билан харид комиссияси томонидан юзаки ёндашилганлиги;

“Ўзбекистон” нашриёт-матбаа ижодий уйи МЧЖ тендер савдолари иштирокчилари ўртасида камида 30% арзон нарх таклифини берганлиги инобатга олинмаганлиги;

ушбу давлат харидида “Ўзбекистон” нашриёт-матбаа ижодий уйи МЧЖнинг тижорат таклифи ғолиб деб топилиши лозим бўлсада, амалдаги қонун талаблари ва тендер ўтказиш қоидалари кўпол равишда бузилиб, тендер ғолиблигидан маҳрум

қилинганлиги;

тендер ҳужжатларининг 2-иловасига биноан иштирок этувчи корхона ҳужжатларни ўрнатилган тартибда расмийлаштириб тақдим этганда харид комиссияси томонидан 1 балл билан, ҳужжатларни ўрнатилган тартибда расмийлаштириб бермаган тақдирда (бирон бир ҳужжат бўлмаса) харид комиссияси томонидан баҳоланмаслиги яъни 0 балл билан тендер савдоларидан четлатилиши белгиланганлиги;

бирок, Ўзбекистон нашриёт-матбаа ижодий уйи МЧЖ ҳар бир мезонга мувофиқ ҳужжатлар тақдим этган бўлиб харид комиссияси томонидан тендер ҳужжатларининг 2-иловасига номувофиқ тарзда баҳоланган ҳолда тендердан четлаштирилганлиги;

Таъминот ва логистика хизмати ДУК томонидан танлов савдолари иштирокчиси бўлган Ўзбекистон нашриёт-матбаа ижодий уйи МЧЖ тижорат таклифи энг мақбул бўлсада, тендер ғолиби деб топилмаганлиги;

Таъминот ва логистика хизмати ДУК томонидан ўтказилган давлат харидлари амалдаги қонунларга тўлиқ риоя этилмаган ҳолда ўтказилганлиги ва бошқа важлар маълум қилинди.

Йиғилиш давомида Таъминот ва логистика хизмати ДУК мутахассислари сўзга чиқиб мурожаатчининг эътирозларига жавобан қуйидагиларни маълум қилишди:

мазкур тендер савдосида иштирокчиларга қўйилган талаблар қонун талабларига мувофиқ белгиланганлигини;

харид ҳужжатларида бухгалтерия ҳисоботларини тақдим этилиши юзасидан иштирокчининг ваколатли орган томонидан тасдиқланган молиявий ҳолати тўғрисидаги маълумотлар (баланс ҳисоботи форма-1, форма-2) агар тақдим этилмаган бўлса ва молиявий ҳолатларда ноаниқликлар топилса иштирокчи харидлардан четлатилишини;

иштирокчининг солиқлар ва йиғимлардан қарздорлиги мавжуд эмаслиги тўғрисидаги солиқ органидан олинган маълумотнома агар тақдим этилмаган ёки тақдим этилган бўлса лекин бюджет ва бюджетдан ташқари жамғармалар олдида қарздорлик аниқланса давлат харидидан четлатилиши ва бошқа важларни баён қилди.

Йиғилиш давомида таклиф этилган вакиллар томонидан билдирилган фикр ва ахборотлар Комиссия аъзолари томонидан тўлиқ тингланди.

Комиссияга тақдим этилган ҳужжатлар ва иш ҳолати батафсил ўрганиб чиқилганда, танлов ҳужжатларида белгиланган малака мезонларига асосан тақдим этилган иштирокчининг молиявий ҳолати тўғрисидаги маълумотлар яъни баланс ҳисоботларидаги (Ф-1, Ф-2) рақамлар 4-сон шаклда (мажбуриятлар устунинда) акс этмаганлиги буюртмачи томонидан ноаниқлик деб баҳоланиб, иштирокчининг

четлатилишига сабаб бўлганлиги, шу билан бирга, четлатилган иштирокчининг нарх таклифи ғолиб иштирокчининг таклифидан 30% гача пастлиги маълум бўлди.

Шунингдек, молиявий маблағлардан фойдаланишнинг оқилоналиги, тежамкорлиги ва самарадорлиги принципига асосан давлат буюртмачиси товарларнинг (ишларнинг, хизматларнинг) қийматини ҳисобга олиши, давлат харидлари учун ажратилган маблағлардан самарали фойдаланиши, шу жумладан, товарларни (ишларни, хизматларни) олишдан кўрилган наф, уларнинг сифати ва қиймати ўртасидаги мақбул нисбатни (фойдаланиш даври харажатларини ҳисобга олган ҳолда) таъминлаши кераклигини инобатга олиб

**Юқоридаги масалаларни кўриб чиқиб, Комиссия қарор қилади:**

**1. 1-масала юзасидан.**

“Polisteel solutions Pte. LTD” компаниясининг мурожаатида келтирилган важлар ўз тасдиғини топмаганлиги, шунингдек энг яхши таклифларни танлашни бекор қилиш тўғрисида қарор қабул қилиш учун етарли асослар мавжуд бўлмаганлиги сабабли шикоятни қаноатлантириш **рад этилсин.**

Мурожаатчига давлат буюртмачисининг ҳаракатлари (ҳаракатсизлиги) устидан суд тартибида шикоят қилиш ҳуқуқи тушунтирилсин.

**2. 2-масала юзасидан.**

Андижон вилоят соғлиқни сақлаш бошқармаси томонидан 2023 йил 3 мартдаги 233066-лот рақами билан “Лапороскоп тиббиёт ускунаси сотиб олиш” юзасидан ўтказилган энг яхши таклифларни танлаш савдоси юзасидан қабул қилинган давлат буюртмачисининг қарори **бекор қилинсин.**

**3. 3-масала юзасидан.**

Ўзбекистон Республикаси ИИБ Фарғона вилояти ИИБ Жамоат ҳавфсизлиги хизмати Йўл ҳаракати ҳавфсизлиги бошқармасининг махсус эксплуатация-монтаж бўлими томонидан 232793-сонли ва 236445-сонли лот рақами билан ўтказилган энг яхши таклифни танлаш савдолари юзасидан қабул қилинган давлат буюртмачисининг қарори **бекор қилинсин.**

**4. 4-масала юзасидан.**

Таъминот ва логистика хизмати ДУКнинг 2023-2024 ўқув йилига умумий ўрта таълим ташкилотлари учун нашр этилиши режалаштирилган машқ дафтарлари да ва ўқув методик мажмуалар сотиб олиш учун ўтказилган жами 11 та (№235685, №235688, №235689, №235690, №235691, №235692, №235693, №235694, №235695, №235696, №235697) лот рақамлари билан ўтказилган давлат харидлари жараёнида баҳолаш меъзонларида рақобатни чеклашга олиб келадиган ёки олиб келиши мумкин бўлган ҳаракатлар мавжудлиги ва бу тендер савдолари иштирокчиларининг



манфаатлари бузилишига олиб келиши мумкинлиги сабабли мазкур давлат хариди **бекор қилинсин.**